

東
華
續
錄

東華續錄

乾隆一百五

臣王先謙敬編

臣周瀚蕃恭校

乾隆五十二年丁未春正月庚午朔閩浙總督常青奏據興泉永道稟稱賊陷彰化十二月初六日陷諸羅見柴大紀帶兵並募鄉勇守城遣員來廈請救查林爽文籍隸漳州其附從率多漳屬難保無內外勾連漳泉兩郡爲內地根本尤爲緊要臣一面移咨兩廣督臣於漳州連界之潮州等境一體防範一面督催兵弁渡臺進剿知府孫景燧業已被害見飭福州府海防同知楊紹裘署理諭軍機大臣等常青此次所奏派兵剿捕各事宜較從前稍有主見略知鎮定但常青摺內稱逆首林爽文係漳州人其附從之徒率皆籍隸漳屬其中難保無內外勾連情事等語此等匪徒糾眾

滋事無論何處民人其從賊者卽係夥黨自應按名駢戮若漳泉民人鄉勇果能應募拒賊出力堵禦防守自應加以獎賞不應豫存歧視稍露形迹轉致漳民心生惶懼別滋事端此時水陸兩提督先後帶兵渡臺已有六千餘名徐嗣曾又經派撥兵丁一千五百名渡臺協勦兵力不爲不厚但閩人性本慆輕若零星打仗致有挫失是輕爲嘗試轉足以張賊勢而餒官軍之氣於事尤屬無益著黃仕簡任承恩務須俟各路兵丁到齊約會日期同時併力夾攻自無難一舉蕞事該督等總須鎮定持重再徐嗣曾奏飛咨廣東浙江二省督撫提督於附近水師營內酌撥戰兵二三千名各於交界本境駐紮如需策應便於徵發亦可藉爲聲援等語此時似可無需鄰省接濟兵力然豫備亦可總宜不動聲色密爲布置不可稍涉矜張驚動眾聽至臺地會匪究係何會與有幾年聚

眾數千蔓延滋擾劫縣戕官該地方文武平日所司何事豈竟漫
無覺察並著常青於事定後查明嚴參示儆但非目前急務此時
惟當鎮輯內地速剿賊匪爲要○乙亥釋富勒渾於獄○丙子諭
向來秋朝審人犯內有業經緩決三次以上人數積多每屆數年
敕令刑部堂官量爲查奏減等以示法外之仁今自乾隆四十九
年十一月查辦之後至五十一年秋讞擬入緩決者又積有六千
餘名其數已爲不少著刑部堂官將上年秋朝審緩決至三次各
犯照前次查辦之例逐一查明各按所犯情節分別減等發落以
昭矜恤該部卽遵諭行○己卯諭臺灣奸民林爽文等糾眾滋事
一案該督常青剿捕逆匪一切調度堵禦機宜辦理尙屬鎮靜妥
協見在水陸兩提督業經渡臺會剿逆匪自無難立時撲滅惟是
海疆重地將來善後事宜均須妥協籌辦常青係初任總督恐未

能料理裕如李侍堯久任封疆雖於軍旅未嫻而辦理地方事務於輕重緩急機宜較爲熟練李侍堯著調補浙閩總督卽馳驛前赴新任湖廣係腹地省分且地方甯謐無事常青自能勝任卽著調補湖廣總督俟李侍堯到閩接印後常青卽來京請訓再行赴任見在李侍堯自京起程常青到楚往返尙需時日李封年老兼署督篆恐精神未能周到所有湖廣總督印務著舒常馳驛前往署理俟常青抵任後再行回京○癸未臺灣鎮總兵柴大紀奏臣於初七日獲奸細林馬訊供賊分水陸兩路犯郡城臣相度形勢惟鹽埕橋扼要隨馳往察看見賊船數百隻浮水而來飭弁兵施放槍礮打沈小船數十隻餘船逃去而徧野賊匪萬餘眾又至復督兵剿殺至初九日打死數十名連日旋退旋來我兵奮戰斃賊數十名數百名不等生擒十餘人俱卽正法又奏接臺灣道永福

札稱鳳邑參將瑚圖里於十二日間賊欲犯鳳山卽帶兵駐城外防禦十三日賊二千餘名來攻瑚圖里督兵攻擊轟斃五六人賊匪俟其追剿乘虛入城該參將卽縱馬南去不知下落知縣湯大奎自刎臣派澎湖協及城守兵千名赴南路抵禦臣仍駐鹽埕橋截拏北路賊匪諭軍機大臣等此次柴大紀與賊打仗奮勇得勝尙屬可嘉北路賊勢蔓延鹽埕橋係水陸扼要之區該鎮自應仍在彼督率剿捕未便遽回郡城以致賊人踵後且南路旣經該鎮派撥澎湖協及城守兵丁共一千名前往諒亦足資抵禦至林爽文等輒敢豎旗結會並用槍礮攻犯城池竟屬有心謀逆此皆由從前辦理械鬪各案該地方官等止期就案完結將就了事並未徹底嚴辦以致刁民肆無忌憚釀成巨案此次惟有痛加誅捕以示懲創斷不可使一名倖逃顯戮但此時不可稍露端倪使賊匪

自知必死負隅固守轉於攻捕無益總之助賊者卽係亂民法無可貸其不肯從賊及幫同官軍出力者無分漳泉俱係良民自應一體獎勵使賊勢日孤易於竣事○丁亥晉封十公主爲固倫公主○諭向來大學士缺出多按資格以協辦大學士補授劉墉在尙書中資分較深且協辦有年本應實授惟是上年在熱河時及回鑾後曾與軍機大臣等諭及嵇璜年老若求回籍不忍不從及曹文植見有老親若求回籍養親亦不忍不從而皆惜之此不過尋常議論耳然見嵇璜精力尙未就衰在漢大臣中最爲老成且欲留以相伴又部院諸臣一時乏人曹文植亦屬能事故胥遲之意軍機大臣自不敢以議論之言卽行宣露事隔多時嵇璜等亦並未有所陳請昨冬召見劉墉偶會與之閒論及此乃次日曹文植於召見時卽有告養之奏朕詢之軍機大臣俱稱並未向嵇璜

等說及同稱係劉墉在懋勤殿所言者朕召見諸臣君臣之間原如家人父子且以劉墉係劉統勳之子內廷行走之人非不可與聞者是以向其論及乃劉墉卽以告之嵇璜等其意不過欲嵇璜聞知請告劉墉卽可覲覲補授大學士似此言語不謹此時豈可卽以劉墉實授以遂其躁進之私耶見在尙書中王杰資俸亦深在內廷行走有年且見在大學士軍機處已有滿洲二人亦不可無一漢大學士王杰著補授大學士所有兵部尙書員缺著彭元瑞調補其禮部尙書著紀昀補授德保紀昀俱屬中材王杰著管理禮部事務以資經理將此通諭知之○己丑常奏臺地將賊目楊振國高文麟等解到據供林爽文住彰化大里杙莊平日窩賊搶竊樹黨結會經該縣俞峻訪問差役楊詠卽楊振國往拘嗣知從前林爽文犯竊被獲係該役賣放遂將該役收禁又問別案

逸犯張烈等亦逃避林爽文處該縣稟知鎮道搜捕林爽文起意
戕官占據縣城於十一月二十九日攻破彰化自稱盟主大元帥
楊振國爲副元帥分攻諸羅淡水楊振國等旋經陳邦光募集鄉
勇擒獲又供天地會係平和縣人莊煙卽嚴煙於五十二年過臺
興起會係廣東後溪鳳花亭和尙洪二房同一十五六歲朱姓人
倡立等語該犯等應請解京究辦一面派員密訪嚴煙下落一面
飛咨粵省躡緝洪二房及朱姓人蹤迹期於必獲以便歸案辦理
諭軍機大臣等常青辦理此事初時未免稍涉矜張嗣據該督等
節次奏到調度進剿各事宜辦理漸有主見至所獲匪犯朕意本
欲令其解京今該督於獲犯審明後卽請解京審辦並鎮靜辦理
各事宜皆與朕意適合不意常青竟能如此甚屬可嘉至嚴煙籍
隸漳州不難卽時擒獲並著常青於拏獲該犯後一併安速解京

前因該處善後事宜緊要恐常青究係初任因思李侍堯外任有
年較爲諳練是以降旨調任令其前往辦理此時該督惟應督率
弁兵於應行辦理之事悉心調度以期迅速庶事朕必加恩嘉獎
更不必以調任榮心稍存疑畏轉於勦捕無益見在黃仕簡任承
恩自必已到臺灣厚集兵勢合力勦捕賊匪自無難立就殲滅一
得捷音迅速馳奏○庚寅諭據曹文植奏伊母年逾八旬陳請終
養等語曹文植供職有年如伊母本迎養在京自無庸令其回籍
茲念伊母年登大耋遠處本籍若不准其歸養朕心實有所不忍
亦非以孝治天下之意曹文植著准其終養伊久直內廷辦理部
務頗爲出力能事著施恩加太子太保銜並御書扁額賞給伊母
以示優眷所有戶部尙書員缺著董誥補授彭元瑞著充補武英
殿總裁蔣賜棨著調補戶部左侍郎兼管順天府府尹事務其倉

場侍郎員缺著劉秉恬調補○諭軍機大臣等臺灣地方自康熙年閒始隸版圖因遠隔海洋該處府廳各縣俱未建立城垣後經朱一貴聚眾滋事平定後總督滿保會議建城惟時以地處海外無城雖難於防守然失之易復之亦易是以未經建立以節繁費但該處久成郡縣與內地無異而城圍尙相沿用竹本編插不足以垂久遠且此次林爽文糾眾猝起縣城遂被砍破究由蒞竹不能防禦所致朕意與其失之復取既煩我兵力駭眾聽聞何如有城可守而勿失更爲有備無虞乎况方今國帑充盈該處郡城廳縣不過五處卽建立城垣動用不過百萬何惜而不爲至建城時如該處可立審座或用外輒內土之法如審座不便該處徧地皆山卽開採石料以代輒工更爲鞏固著李侍堯於臺匪蕩平之後詳細熟商歸入善後事宜案內一併妥議勘估繪圖具奏○癸巳

命王杰爲東閣大學士兼禮部尙書

二月庚子袁鑒緣事解任以王兆棠爲江甯布政使康基田爲江

蘇按察使

由淮徐道遷

○辛丑

上御經筵

○諭前經理藩院議准將

回子哈第爾所襲郡王品級貝勒照內地扎薩克例出缺降至公
爵准其世襲罔替但伊父霍集斯從前曾經出力報效且又拏獲
逆瓦齊頗著勞績著施恩將哈第爾見襲郡王品級貝勒准其世
襲罔替嗣後缺出不必降等襲封再額色尹托克托所襲公爵降
至三等台吉方准世襲罔替因圖爾都並無子嗣會將額色尹之
孫托克托過繼與圖爾都爲嗣承襲公爵其額色尹圖爾都實係
回部和卓後裔伊等從前俱屬效力托克托又係額色尹之孫伊
見在承襲輔國公爵缺出不必削除准其世襲罔替以示朕軫恤
回部臣僕之至意○甲辰以李綬爲左都御史轉沈初爲兵部左

侍郎以吳玉綸爲兵部右侍郎

由左副都御史遷

○乙巳諭上年山東司

監及歷城縣連有越獄之案該撫明興既未能先事防範臨時又不能妥速拏獲及該犯等竄逸後至今尙有七名在逃又大名糾眾戕官一案首犯段文經徐克展等雖在直隸聚眾滋事而八卦會邪教在東省單冠二縣者居多明興疏縱之咎已無可辭及段文經等逃至館陶又不能卽時弋獲以致正犯日久稽誅况徐克展一犯卽係豫省委員在亳州訪拏山東亦係鄰省明興何以獨不能代爲緝獲看來該撫於兩案要犯始猶望其奮勉補過今日久未獲該撫又恐懼惶惑一籌莫展竟至于足無措山東地方緊要難望其振作有爲豈可復留巡撫之任致滋貽誤明興著來京候旨所有山東巡撫員缺著長麟補授○常青奏十二月三十正月朔一等日賊攻郡城鎮道督率弁兵義勇勦殺斃賊甚多諭軍

機大臣等此次與賊打仗文武官弁及兵民義勇人等協力勦殺奮勇得勝保護郡城實屬可嘉俟常青抵臺灣於勦捕完竣後查明實在出力人員分別奏請交部議敘所有義民鄉勇激發公義協力勦賊尤堪嘉獎僅令地方官分別獎賞尙不足以示鼓勵著常青於抵臺灣後查明各義民鄉勇內如係務農經商生理者卽酌免交納賦稅若係首先倡義紳衿本有頂帶者卽開列名單奏明酌予職銜以示優異至黃仕簡任承恩於正月初四初六前後抵臺迄今已一月有餘何以尙未據奏報勦賊消息該提督等係專閫大員抵臺灣已久卽待厚集兵力剋期進攻亦應將賊匪情形隨時奏報乃至今總無消息所辦何事黃仕簡任承恩著傳旨嚴行申飭看來黃仕簡任承恩全不諳事理輕重緩急且彼此俱係提督不相統攝竟有互相觀望之意於勦捕事宜不能得力近

來常青屢次奏報甚有主見籌辦一切頗合機宜此時李侍堯自
已抵泉州常青交印後卽速渡臺灣督同黃仕簡等剿捕賊匪務
將賊首林爽文王芬及此外有名頭目擒拏解京盡法懲治不可
任其逸入內山原任山東按察使楊廷樺曾任臺灣道且在閩省
年久於該處情形自所熟習其獲咎因監犯越獄究非私罪可比
前已有旨交與李侍堯帶往差遣委用見值用人之際卽著楊廷
樺補授臺灣府知府仍帶革職留任並傳諭常青俟李侍堯到後
卽令楊廷樺渡臺灣接印任事○丙午諭明興於本省越獄要犯
及直隸大名滋事首犯段文經等不能認真緝獲昨已降旨令其
來京候旨第念明興獲咎因辦理地方事務不能振作有爲尙無
大過所有刑部右侍郎員缺著加恩卽令明興補授仍帶革職留
任八年無過方准開復○戊申調玉德爲安徽按察使

由山東調○己

西諭軍機大臣等前據常青奏鹿仔港署守備陳邦光帶領弁兵率同泉州粵省義民攻復彰化縣城擒獲賊目高文麟等四犯又據徐嗣曾奏鳳山滋事不法之賊首王啓即曾錦等已被擊獲賊人於十二月三十日來犯郡城鎮道親督義民與遊擊等分路剿殺賊匪無數各等語是彰化縣城久經陳邦光等收復其鳳山等處亦經柴大紀等派兵分路剿捕郡城已無事矣何以黃仕簡摺內僅稱派委總兵等分赴南北二路進剿恢復縣城竟似該處軍情全未知悉者看來黃仕簡意思安坐郡城並不親赴各該處督率剿捕大屬非是提督爲專閫大員領兵是其專責黃仕簡深受朕恩見帶兵剿賊雖係病後理宜奮勉出力乃於剿捕事宜奏報遲延全不得行軍要領該提督所司何事試思臺灣郡城經賊人屢次攻犯該鎮等當大兵未到之先尙能保護無虞焉有此刻又

添提督所帶大兵轉須協同守禦之理豈黃仕簡竟欲以守護郡城爲名遷延坐視耶黃仕簡著傳旨嚴行申飭至任承恩由鹿仔港登岸卽應將該處賊匪情形及辦理剿捕事宜先行具奏乃日久並未據有奏報見據常青摺內稱該提督尙無進兵確信探聞見在駐紮彰化等語任承恩係自請前赴臺灣捕賊旣由鹿仔港一路進兵卽應督同陳邦光等上緊追捕殺賊並知會黃仕簡分路會合夾攻何以駐守彰化漫無籌畫其心何居任承恩亦著傳諭嚴行申飭○辛亥諭臺灣賊匪林爽文糾眾滋事見據任承恩奏臺灣府知府孫景燧彰化縣知縣俞峻鹿仔港巡檢馮敏宗同時被害各將印信令家屬呈繳等語孫景燧等守禦城池猝被戕害殊堪憐憫著交部從優議卹○壬子免福建臺灣府屬本年額賦○癸丑調宜興爲盛京戶部侍郎玉鼎柱爲盛京禮部侍郎瑪

興阿爲吏部右侍郎以海甯爲兵部左侍郎

由副都統遷

○甲寅諭軍

機大臣等任承恩既探知賊首林爽文潛回巢穴自應多帶弁兵

親往擒捕乃分派遊擊都司等零星堵禦殺賊甚少而千總葉榮

等轉被賊槍傷陣亡更屬不成事體從來行軍制勝合則勢強分

則勢弱况閩人性本剽悍若令零星打仗輕於嘗試轉恐挫失氣

餒朕屢降諭旨甚明任承恩豈不知之而乃輕分兵力以致損失

威重乎前此署都司易連署守備陳邦光以微末員弁尙能督率

兵民鄉勇等多殺賊眾收復鹿港彰化竹塹等處任承恩到彼後

惟就已得之處駐紮觀望僅以派員堵禦了事是誠何心任承恩

著嚴行申飭至黃仕簡前此所奏南北二路殺獲賊匪情形亦係

接據總兵柴大紀郝壯猷咨報並未躬率士卒迅速追剿黃仕簡

所辦何事大非向日嘉予期望之意亦著嚴行申飭伊二人俱不

免遲延觀望而任承恩爲尤甚恐於剿捕不能得力常有速渡臺
灣遵照節次所降諭旨實力籌辦以期一舉蕺事朕於軍務從來
賞罰嚴明其奮勇出力者必優加甄錄而畏葸退縮者亦必重治
示懲黃仕簡任承恩等甯未聞知豈可自蹈重愆以致百身莫贖
乎並著常青詳悉諭知該提督等俾各知儆惕以期戴罪圖功奮
勉集事○戊午諭軍機大臣等前因黃仕簡任承恩奏報各摺僅
派委將弁零星打仗並未親臨行陣屢經降旨嚴行申飭然尙以
黃仕簡或因年老多病猶存憐憫之念今據伊所奏摺內於見在
軍務情形置若罔聞是黃仕簡與任承恩互相觀望遷延時日黃
仕簡不宜如此朕亦不能因其老病曲爲憐宥矣至任承恩摺內
有鎮定持重之語伊見在如此退縮不前竟屬怯懦無能豈可藉
詞持重乎伊二人於剿捕賊匪種種遲延難辭貽誤之咎任承恩

知斗六門一帶。有賊踞守。卽應督同將弁等親往追捕。將賊眾痛加殲戮。俾與黃仕簡一路聲息相通。庶賊人聞風膽落。首犯得以剋日就擒。今伊等如此遷延觀望。幸賊人亦如伊等畏葸無能。不至更肆鴟張。儻賊眾偵知官兵鬆懈。復轉相糾眾。逞其狡猾。致大軍稍失威重。尙復成何事體耶。又任承恩奏稱。接據都司馬元勳稟報。埔心莊打仗殺斃賊目餘黨。逃散當委親隨妥弁前往確查之處。尤屬不成事體。任承恩如果親往該處督勦。於該都司稟報虛實何用。更委員弁前往確查。豈任承恩竟思安坐彰化觀望不前乎。黃仕簡任承恩著再傳旨嚴行申飭。並著該提督等親帶弁兵會同勦捕。勿再仍前延緩。致干重戾。○庚申諭據李世傑徵瑞奏查明營伍硝磺缺額。實由採運稽遲。請將三十六年以後辦磺遲延四十六年以後辦硝遲延之歷任江甯蘇州各藩司交部嚴

加議處一摺硝磺爲軍火要需我國家武備修明戎行整飭凡遇
臨敵制勝尤藉槍礮爲利器必須平時操演精熟方能所向無前
卽如京師健銳火器等營按期每日操演需費硝磺甚多而各直
省營伍亦皆按期操演是採辦火藥爲兵丁練習之需最關緊要
斷無因多費硝磺遂停止操演之理且各省俱經委員採辦未聞
缺額何獨江南遂形短絀至李世傑前奏硝磺不敷由於歲需煙
盒之語更無是理硝磺係自然之利鋪戶製造花爆售賣者甚多
卽如京城每遇除夕元旦燈節居民所放花爆晝夜喧闐不可勝
計又如江浙等省商賈輻輳之區售賣花爆何止數千百萬與營
員軍火有何關涉若果於軍器所儲有礙朕必早降旨禁止民間
花爆矣况見據李世傑等奏江蘇通省各營歲需硝磺八萬九千
餘斤而匠鋪硝磺每年約需十七八萬或二十餘萬斤不等其數

倍於營伍可見民間所用花爆需費硝磺無礙軍火與該督前奏自相矛盾至兩淮年例歲進煙盒七架大小爆竹一萬所需無幾前據徵瑞查明每年採辦止開銷銀一百一十餘兩較之通省各營及匠鋪所需硝磺爲數不及百分之一卽內務府花爆作每歲開銷僅需硝磺一千餘斤其數較之江蘇匠鋪亦不過二十分之一而謂硝磺不敷由於煙盒有是理乎明係承辦之藩司等採運遲延創爲此語以爲卸罪地步豈能上而欺朕下而惑眾而該督不以爲怪轉以此牽涉聲敘其過甚大但該督既有此奏轉不值以年例所需致伊等得藉口所有兩淮每年例進煙盒爆竹著卽行停止京城花爆作何所不可至該藩司等採辦遲延託詞支飾李世傑冒昧陳奏均應重治其罪但恐外間無識之徒不知伊等貽誤軍火妄謂摺內牽涉煙盒聲敘以致獲咎是誠全無人心

者不得不反復剴切曉諭此案袁鑒係屢經獲罪加恩錄用之員乃敢如此巧爲諉卸最爲可惡前經降補知府猶不足以蔽厥辜著卽革去頂帶仍留知府之任三年不准支食廉俸李世傑本當照部議革任但念其平日辦理地方事務尙屬留心且究因病後精神昏耄未能認真查覈所致著從寬免其革任亦三年不准支領養廉至蘇松各營硝磺既有缺額操演時又將儲備火藥動用蘇州藩司亦有遲延閱鴟元身爲巡撫豈竟毫無聞見所司何事何以並未查辦著明白回奏所有三十六年以後辦磺遲延四十六年以後辦硝遲延之歷任江南蘇州布政使著交部嚴加議處外並著照各營缺額硝磺例價各令十倍罰賠以示懲儆餘俟該督等查送職名到部一併議處經此次查辦之後各營火藥務須嚴飭委員採買足額迅速解營年清年款若再因循遲玩朕必照

貽誤軍需之例重治其罪決不稍爲寬貸也陳杰據實直奏可嘉
著交部議敘將此通諭知之○諭總兵柴大紀督率官兵義勇保
護郡城最爲出力可嘉郝壯猷在南路一帶督兵攻勦殺賊多人
亦屬認真奮勉自應酌量加恩以示獎勵著常青查明該鎮等如
未經賞過花翎卽傳旨加恩賞戴令其益加奮勵各帶官兵分投
勦捕以期迅速賊事至黃仕簡任承恩並不親臨行陣貽誤事機
已降旨令常青查明卽行參奏解任將水師陸路提督印務交與
柴大紀郝壯猷暫署常青務須飛渡臺灣遵照節次所降諭旨督
率柴大紀等分帶官兵相機妥辦黃仕簡任承恩並著先行摘去
花翎○轉趙鏌爲工部左侍郎以劉躍雲爲工部右侍郎

由內閣學士遷

由光祿寺卿遷

○甲子

上啓鑾謁

東陵

○免經過地方本年額賦十分之三○丁卯

上謁

昭西陵

孝陵 孝東陵 景陵至 孝賢皇后陵奠酒○戊辰 上幸盤

山

三月辛未軍機大臣議奏署湖廣總督舒常奏審擬江陵縣劫盜周國泰等分別斬決發遣知縣楊廷芳等各員分別發遣杖革均如所擬得旨此案於乾隆四十三年卽經事主具報被盜該守令等俱不上緊審辦上司亦未查催任意遲延幾及十年之久足見湖北吏治廢弛已極不可不嚴加懲創除厯任之督撫司道交部查照職名嚴加議處具奏候朕另降諭旨外其知縣楊廷芳著於該處先行枷號一年黃煒著枷號半年俟滿日再照議分別發遣杖徒議以革職之知縣亢依祿王嘉謨孔毓檀俱著枷號三箇月革職知府曾恆德廷毓俱著枷號一箇月汪獻琛俟解到之日該督撫審擬具奏後卽照此辦理此內應行枷號各員如有回籍者

並著提至該省枷號以爲親民之官尸祿不理民事之戒其盜犯周國泰著卽處斬餘依議○調景安爲河南按察使以姚頤爲甘肅按察使

原任湖南按察使

○壬申諭軍機大臣等前以賊匪不過烏合

之眾無難立時撲滅是以會諭常青到臺灣後卽令任承恩來京常青在彼督同黃仕簡辦理搜捕事宜今任承恩黃仕簡並不帶兵前進甚不如前竟不可恃矣卽如常青摺內所稱賊匪退守巢穴於諸羅之斗六門大里杙等處羣聚滋擾任承恩所帶之兵勢覺單薄又李侍堯奏稱見在兩提臣南北兩處信息雖已從海邊彼此知會而腹地道路尙未相通等語賊匪旣圍聚斗六門大里杙等處兩提督如果彼此知會奮勇夾攻軍威壯盛自可迅擄賊巢何至賊匪得負隅圍聚文報尙從海邊知會伊二人觀望遲誤之咎已無可解免屢經降旨交常青到彼嚴查參奏該督此摺自

係未接諭旨時所發計目下該督已可到彼務宜遵照秉公嚴審
據實具奏不可稍事姑息至一切勦賊善後事宜全在常青妥協
經理該督須於奮勇之中加意持重以期剋期蒞事慰此塵懷其
兵丁接應口糧及稽查內地各口岸亦係要務李侍堯向能辦事
自能就近妥辦不至貽誤所奏臺灣軍務既由常青專摺具奏李
侍堯卽不復由驛馳奏所見甚是自應如此以省驛馬之勞○癸
酉 上回鑾○甲戌諭向來情節較重罪不至死人犯有發遣伊
犁給厄魯特爲奴者第念彼此言語不通難於役使未免不能約
束易致脫逃應將此等發遣爲奴人犯發給伊犁察哈爾或伊犁
駐防官兵爲奴庶易於役使且該處有協領佐領總管等官管束
不至脫逃嗣後如有發遣伊犁給厄魯特爲奴人犯著刑部發往
伊犁分給該處察哈爾及駐防滿洲官兵爲奴所有從前給厄魯

特爲奴之例著停止○丙子以重修明陵告成 上親臨閱視○

諭順治年間因明陵附近居民於陵旁樵採會奉 諭旨禁止並

添設陵戶看守數十年來地方官並未小心稽查以致殿宇損漏

墻垣欹側之處甚多前年朕親臨奠醑緬懷前蹟是用惻然因特

發帑金揀派大臣監督將各陵重加修葺茲屆工竣朕便道親臨

閱視殿宇煥然松楸如舊第恐閱時既久地方官查禁不力復不

免有私行樵採及殿宇墻垣間被風雨損壞等事嗣後應交直隸

總督責成霸昌道就近專管稽查仍於每年十月著工部屆期奏

請派該部堂官一員前往查勘如有殿宇墻垣樹株傷損等事惟

該管道員是問以示朕加禮勝朝保護舊陵至意著爲令○福建

陸路提督任承恩汀州鎮總兵普吉保奏本月十三日林爽文由

番婆莊來攻鹿港臣任承恩卽督令遊擊穆騰額等領兵堵禦臣

普吉保抄截後路至番仔溝奮勇擊殺賊甚多又署參將馬元勳同日於埔心莊遇賊三四十來攻奮力追殺賊人敗退論軍機大臣等林爽文既敢親至鹿港滋擾卽係自來就死任承恩正當親帶弁兵迎頭痛加勦殺將首惡擒縛則其餘附和自必紛紛瓦解何以任承恩並不親身擒捕僅派令遊擊等與賊打仗且任承恩與普吉保見在一處普吉保既帶兵勦賊而任承恩竟安坐鹿港豈欲因人成事抑待賊自斃乎殊出情理之外況賊將所掠婦女逼令露體出陣冀厭槍礮可見賊勢已窮行徑可笑無難一鼓殲擒乃任承恩一味畏葸遲延不進看此情形見在賊匪尙未撲滅竟係任承恩與黃仕簡始終兩相觀望貽誤緊要軍務向來黃仕簡辦事尙知奮勉此次因有任承恩同往致生觀望設或任承恩不赴臺灣黃仕簡專辦此事無可推諉轉未必惟怯至此任承

恩斷不可再留該處致壞士氣著常青一抵臺灣卽傳旨將任承恩飭令卽行赴京候旨其陸路提督員缺前有旨交郝壯猷暫行署理但行軍之際須將奮勉出力之員加之鼓舞以勵戎行並著常青於普吉保郝壯猷二人內察看孰爲出力一面奏聞一面將陸路提督卽行交與署理以示鼓勵至黃仕簡如查明貽誤屬實亦不可留於該處卽遵照前旨將伊解任送回內地請旨辦理其水師提督印務交柴大紀暫署候朕另降諭旨○戊寅 上還京師○辛巳諭各省舉人教職由本班截取銓選知縣例應該省督撫驗看其不勝民社者隨時奏聞改爲司鐸或仍留教職本任於激敘官方之中原寓體恤寒畯之意在各督撫受朕簡任身爲封疆大吏於驗看時本應悉心甄別秉公辦理不至徇情受賄任意愛憎俾才具衰庸者得以濫竽而年力尙堪驅策者轉致屈抑但

思舉班選用知縣需次多時人人各思自效一經督撫驗看不勝民社遽停其銓用未免心懷觖望妄生訾議究不足以服人心而昭公當嗣後直省舉人教職由本班截取知縣經該督撫驗看難勝民社如該員不甘就教情願赴京引見者仍著該督撫照例給咨送部候朕鑒定其或因路遠跋涉維艱不能赴京者准赴鄰省督撫呈明覆加驗看儻係年力未衰原驗督撫果有不甚確實之處卽由鄰省督撫奏明再行給咨送部引見以示朕用人行政一秉至公卽微員亦不使稍有向隅至意○閩浙總督李侍堯奏總兵郝壯猷於二月二十一日收復鳳山北路賊匪自必聞風震懾如鳳山無須重兵卽可全力專注北路又查出逆匪林爽文僞示三張謹封固呈覽諭軍機大臣等官兵已將鳳山縣城收復是南路賊匪業經潰散竄逃無難接剿淨盡黃仕簡卽應督率將弁迅

赴北路會合任承恩分路夾攻以期一舉蕺事乃竟仍安坐郡城
按兵不舉而任承恩亦惟於賊匪來擾時派撥弁兵零星堵禦並
未親身帶兵直抵賊巢李侍堯心思周到自早已看出伊二人之
誤事但以黃仕簡承襲公爵久任提督素昔恩遇較優而任承恩
係任舉之子朕軫念伊父前勞特加錄用擢至提督不免爲之稍
留地步是以不肯直奏但該提督之因循貽誤朕於數千里外尙
早經洞燭况李侍堯駐紮泉州耳目較近而所屬文武員弁內亦
必有議論及此並探聽情形稟報者見已節次降旨令常青嚴行
查辦李侍堯如果有所見聞卽據實具奏不必稍爲瞻徇諱飾也
至逆匪林爽文竟敢自稱年號其悖逆之處罪大惡極覆載不容
俟將來逆酋生擒必當嚴行盡法以申國憲而快人心此時常青
惟當申明紀律鼓舞士氣俾壁壘一新人人用命以期擒拏首夥

迅速藏功○以鄒奕孝爲內閣學士

曲崇

○己丑諭臺灣逆匪林

爽文等糾眾滋事水陸兩提督帶兵分路進剿並不親臨行陣定期會攻黃仕簡株守郡城任承恩安居鹿仔港僅派委將弁等零星打仗二人彼此觀望不思立功首進惟事遷延致賊匪日久未就撲滅節經降旨嚴飭並諭令常青前赴臺灣督辦將黃仕簡任承恩貽誤之處據實嚴審查參茲據李侍堯奏到軍務情形一摺內稱南北兩路該提鎮等各有牽掣不免坐費時日等語果不出朕所料黃仕簡受恩最久向來辦事尙屬黽勉乃於剿捕逆匪一事漫無籌畫安坐郡城因循玩誤本應卽拏問治罪姑念其年老且係病後著將黃仕簡卽遵前旨送回廈門內地候旨水師提督著郝壯猷暫署至任承恩經朕屢加拔擢用至提督且自請前赴臺灣剿賊伊年力正強理應加倍奮勉以期迅速藏功乃亦遂巡

畏蕙並不親督將弁上緊追勦與黃仕簡互相譏卸實屬孤負朕
思前已有旨令常青將任承恩解任送回內地俟伊到後卽著傳
旨革職拏交刑部治罪並著李侍堯派委妥員押解來京其陸路
提督員缺前因柴大紀保守郡城尙爲出力本欲將伊擢用但柴
大紀於林爽文等滋事之先不能豫爲防範以致逆匪蔓延本卽
有罪且臺灣原設兵額一萬餘名該鎮督率守城之兵不過一千
餘名此外兵丁見作何用並未據柴大紀奏及實有應得之咎卽
將來事竣時若查明果能如前奮勇自效亦僅可以功抵罪不當
復邀優擢所有福建陸路提督員缺卽著藍元枚調補所遺江南
提督員缺著陳杰補授陳杰於江南營用硝磺缺額一事據實陳
奏並不瞻徇甚屬可嘉見在李世傑等因此獲咎或該督等心懷
嫌怨亦所不免是以朕轉加升擢用示勸懲將此通諭知之○諭

向來大挑舉人俱於會試榜後該部定期奏請揀選但念各省會試舉人旅食京師俟榜後再行挑選未免有需時日此次大挑舉人著卽在榜前辦理俾得及早回籍無須守候以示體恤再此內有年老舉人精力已衰情願得授京銜者並著派出之揀選王大臣照上屆之例按其年齒分別存記俟榜後開單具奏照例賞給職銜用昭嘉惠耆齡壽考作人至意○辛卯諭湖北巡撫李封來京陛見奏稱年力就衰遇事健忘貽誤封疆要務懇請留京補用等語觀其詞意出於忱惓可憐著照所請准其留京姜晟著補授湖北巡撫所遺刑部侍郎員缺卽著李封補授湖北見有舒常在彼兼署巡撫事務姜晟俟會試出榜請訓後卽行前赴新任○諭軍機大臣等臺灣初起事時朕卽不願任承恩前往者恐二人不相統屬未免有推諉觀望之事因將李侍堯調補閩浙總督並令

常青前往臺灣督辦以防緩不濟急幸而事事豫爲布置否則該處止有常青一人既不能分身前往而黃仕簡任承恩今竟如此因循貽誤賊匪日久蔓延設乘閒別生枝節致蹈從前朱一貴滋事故轍或竟如木果木之失事尙復成何事體卽今李侍堯果看出該提鎮彼此觀望坐廢時日賊黨益多兵氣漸餒不俟常青知會卽飛咨粵省令豫派之將弁兵丁刻日起程籌辦甚爲周到勤合機宜頗慰朕懷惟粵省豫備之兵既有四千名恐陸廷柱一人不能照料已有旨令梁朝桂赴閩粵交界處所聽候調遣著孫士毅卽飛札梁朝桂速行前往帶兵赴鹿仔港勉力會剿從前賊匪初起時孫士毅調發弁兵前往策應朕以本省兵力已厚是以降旨諭令撤回今復須徵調雖似多一番往返之勞然竟實受撤回之益設使彼時粵兵早抵臺灣不過分屬任承恩黃仕簡二人帶

領仍派令零星打仗該兵丁見閩兵不能得力自必日漸氣餒徒使有用之兵亦歸無用此番新調之兵初抵臺灣聽常青帶領其銳氣方盛正可資其生力轉於軍務有裨至黃仕簡任承恩玩誤緊要軍務之罪均應按律正法但念黃仕簡年老又係病後且伊從前辦事尙屬勤勉姑貸其一死令其退廢家居自思咎戾所有公爾仍加恩令伊長孫承襲至任承恩之父任舉前在金川陣亡任承恩又見無子嗣朕軫念前勞不忍令捐軀殉忠者絕嗣任承恩俟刑部照例定擬具奏時尙可加恩貸其一死但老師糜餉之罪伊二人百身難贖若使倖免餘生之人坐享豐厚不足以示廢弛軍旅之戒將來事竣後所有多延時日糜費之軍需銀兩均應於黃仕簡任承恩名下追賠以示懲儆至常青於初六日放洋見在已抵臺灣務照節次所降諭旨悉力籌畫安速督辦○乙未諭

軍機大臣等本日李侍堯奏到臺灣情形一摺並鈔錄海防同知楊廷理原稟據稱賊匪滋事以來大兵僅屬固守皆以兵單難於遠捕爲辭如彰化早經恢復而任承恩駐兵鹿仔港普吉保駐兵埔心莊諸羅收復月餘而柴大紀駐兵城外鳳山復經收復郝壯猷分駐四門靜守黃仕簡駐守郡城以致賊匪各路嘯聚見在臺灣之兵統計一萬三千有餘合之則多分之則寡等語該同知所稟各情形早在朕過度之中可見兵力以分而見單伊等貽誤實由於此昨經降旨將任承恩革職拏問尙以黃仕簡年老有病僅令革職撤回內地伊等如此玩誤則二人厥罪惟均黃仕簡亦難稍爲寬宥著李侍堯一俟黃仕簡撤回廈門卽傳旨一併革職拏交刑部治罪至該督等株守延玩令將弁等效尤觀望不能早擒賊首俾賊匪得轉相嘯聚逼脅平民中不肖之徒勢必與賊烏合

日積日眾滋擾蔓延昨經李侍堯奏請添調粵兵四千名一由廈門赴鹿耳門一由蚶江赴鹿仔港等語看此情形常青處所有之兵尙未免單薄著傳諭李侍堯如粵兵尙未分路配渡卽檄令前赴鹿耳門直抵臺灣府城俾常青處兵力壯盛足資調遣如業經分路配渡前進著常青於粵兵將抵鹿仔港者亦卽調來合爲一處常青親帶勇往將弁徑赴大里杙賊巢鼓勵弁兵務將首惡林爽又一鼓擒獲其餘賊眾不難撲滅淨盡又閱該同知原稟內見在府城諸羅彰化之間各處皆有賊人屯集常青經過地方中途遇有賊匪抗拒正可痛加殲戮俾賊匪聞風膽落路途無阻直抵賊巢此事惟仗常青遵照節次指示悉心籌辦紓朕南顧不至復蹈黃仕簡任承恩故轍也其柴大紀郝壯猷普吉保因二提臣觀望不無效尤今二提臣已拏問其柴大紀三人效尤之罪且赦不

問令其效力帶兵贖罪如伊等亦有畏葸觀望情事或不可令其效力卽著常青據實參奏毋得稍有徇隱

夏四月辛丑諭黃仕簡奏三月初十日海壇鎮總兵郝壯猷來至臺灣郡城據稱初四日參將瑚圖里稟報自山猪毛被賊攔截不能過溪該總兵隨派員帶兵前往接應行至硫磺溪猝遇賊匪圍截衝散官兵未回甚多賊卽夾攻營盤並攻縣城東門該總兵將城外官兵移駐城內防禦初八日賊匪益漸加增攻犯更急由南門進城放火攻殺以致官兵衝散等語郝壯猷係派往南路剿捕大員旣經收復鳳山縣城自應一面派兵設卡防守一面親率將弁追剿賊匪乃安坐營盤旣聞瑚圖里被賊攔截不卽親往接應以致賊匪乘勢攻圍縣城復陷况該總兵所帶之兵計有三千餘名不爲不多當賊匪來犯時兵丁等畏賊退避該總兵卽應將退

避者立時正法數人使知儆懼其餘策令向前一鼓作氣同心抵禦何至紛紛潰散卽或賊多兵少勢不能支亦應奮不顧身殺賊而死甚至無能自刎庶不失城亡與亡之義從前征勦緬甸時如明瑞觀音保扎拉豐阿皆因綠旗兵丁恇怯不能勝敵今日適有松潘鎮總兵穆克登阿來京陛見經朕詢問據稱征緬甸時伊卽跟隨明瑞等打仗目擊彼時情事將軍等非不可以退出而明瑞等僉言受恩深重兵散勢窮甯死於賊不死於法卽或退出後倖邀寬典亦何忍覩顏視息是以不肯生還等語朕聞其言猶欲爲之墮淚明瑞等能知大義咸以身殉其身後旣邀優卹世職復予專祠子孫至今受恩勿替歿有餘榮郝壯猷以專閫大員甯不聞知乃亦奴綠旗兵弁恇怯惡習自羅重辟且日前降旨將任承恩革職等因時其陸路提督員缺朕因郝壯猷收復鳳山尙爲出力

會諭令常青查明如果郝壯猷堪勝提督卽行奏明候朕簡放今
伊於賊匪復犯鳳山時旣不能先事防禦又不能督率弁兵奮勇
殺賊潛同郡城似此畏怯倖生之員若不明正典刑其何以肅戎
行而昭軍紀常青接奉此旨卽將郝壯猷在臺灣郡城傳集眾將
弁將伊正法並將前旨本欲用爲提督及見在又因其棄城潛回
是以按軍法從事各緣由向其宣諭俾知賞罰分明禍福惟其自
取郝壯猷卽身伏刑誅亦當死而無怨其派往接應及城內各官
兵又皆何往並著常青查明據實參奏至瑚圖里身係滿洲前於
賊匪滋擾鳳山時因兵丁衝散該參將遂乘馬馳至郡城已有應
得之罪第念其究因倉卒兵散所致與自行脫逃者有間是以仍
令帶罪效力今據黃仕簡奏該參將又於山猪毛地方被賊攔截
不能過溪若係賊人踞守溪河險隘尙屬可原儻竟係該參將畏

懼賊勢借詞躲避亦如郝壯猷之迷罔則其罪更無可追著常青
卽查明一面奏聞一面將該三將正法示眾此事總由黃仕簡任
承恩二人一南一北互相觀望以致各鎮將效尤玩誤久稽肅事
幸而朕洞燭幾先早令常青往臺灣督辦得以及時整頓設朕亦
不豫爲籌及直遲至此時始派常青前往該處無人統率而黃仕
簡又以病軀懦怯諸事稽亂或竟至墮賊術中爲其所擄更屬損
失威重尙復成何事體見據常青將該提鎮等罪狀查明參奏並
自請議處除郝壯猷應行正法及黃仕簡任承恩鞫問之處另經
降旨外柴大紀普吉保姑念其從前奮勇見令帶罪自贖暫著從
寬交部嚴加議處以觀後效常青從前率據黃仕簡等各報冒昧
入告咎亦難辭但念其遠隔重洋未能得知確信且該督見在臺
灣督辦本日奏到各摺悉合機宜常青著加恩免其議處該督自

當益加感激思奮安速籌辦昨據李侍堯奏所謂粵省兵丁四千
名抵閩時卽陸續配渡見有添派閩省駐防及內地官兵共三千
餘名交恆瑞藍元枚分帶前往各兵未到以前與其閒住待兵不
若常青就臺灣見有官兵選派精壯者先令前赴郡城附近處所
或南路鳳山一帶將鼠聚賊匪掃除淨盡廓清後路指日官兵雲
集會合剿捕直搗賊巢更無返顧之憂料此么磨草竊無難一鼓
殲擒此事見交常青督辦常青卽著授爲將軍恆瑞藍元枚著授
爲參贊俾事權歸一軍威益振以期迅奏蕩平綏靖海疆將此通
諭中外知之又諭前因李侍堯奏南北兩路提督各有牽掣不免
坐費時日等語已降旨將任承恩革職交刑部治罪黃仕簡撤
回廈門候旨矣此次臺灣逆匪林爽文等糾眾滋事任承恩亦奏
請前往朕意卽以任承恩不應同赴臺灣亦恐水師非其所轄呼

應不靈未免掣肘轉於勦捕無益但因任承恩業已登舟配渡多一人或可得一人之益是以未令轉回詎伊二人抵臺灣後並不親臨行陣定期會攻一南一北互相觀望果不出朕所料以致賊匪日久蔓延迄今未能撲滅其玩延貽誤厥罪維均卽或黃仕簡因年老患病不能親身帶兵卽任承恩到彼後不能不零星堵禦抑或賊匪眾多兵力實不敷勦捕之處伊二人早應隨時據實直陳候朕指示籌辦乃伊等並無一字奏及是其種種貽誤實無可置喙而黃仕簡係水師提督臺灣乃其專轄見在勦捕事宜又經朕特交督辦乃安坐郡城漫無籌畫伊尙如此畏葸因循更無怪任承恩之意存推諉其罪視任承恩爲尤重任承恩旣經革職拿問黃仕簡亦難寬宥昨已降旨將黃仕簡撤回內地俟伊到廈門時著李侍堯卽傳旨將伊一併革職拿交刑部治罪若論黃仕簡

任承恩貽誤緊要軍務之罪均應按律卽行正法朕辦理軍務信賞必罰而於畏葸退縮者尤必重加懲治故能紀律嚴明將士用命所向克捷底績成功今黃仕簡任承恩恇怯貽誤若在他入必當正法但念黃仕簡年老又係病後且伊從前辦事尙屬勉受恩最久所有公爵係伊祖所立功績自應承襲卽照黃仕簡從前原奏令伊長孫黃嘉謨承襲至任承恩係任舉之子任舉前在金川出兵時打仗陣亡其長子又以巡捕營遊擊因救火得傷身故亦無子任承恩見無子嗣若將任承恩正法是任舉臨陣捐軀竟至絕嗣朕心實有所不忍黃仕簡任承恩俟到部時該部自當照例定擬具奏然均可加恩貸其一死所有福建水師提督員缺著藍元枚調補其陸路提督員缺自當於臺灣總兵內擢用柴大紀於林爽文滋事不能豫爲防範到諸羅後又不進剿斗六門賊匪

本不當復邀升擢但念其防守郡城尙爲奮勉出力功罪自不相掩所有陸路提督員缺著加恩令柴大紀暫行署理以觀後效○

丙午以張廷化署鴻臚寺卿李天培爲湖北按察使○以歸景照爲浙江按察使

由山西翼甯道遷

○庚戌諭軍機大臣等沿海盜賊最爲

商民之害今閩省蚶江一帶劫案甚多並未將首夥卽時拏獲而嶼仔尾地方僅距廈門十餘里盜賊竟敢縱橫無忌行劫兵船可見該省政務廢弛已非一日地方官怠玩諱飾全不以緝盜安民爲事遇有劫案僅以尋常械鬪將就完結希圖了事以致釀成巨案且臺灣遠隔重洋最關緊要道府廳縣必須才守兼優之員方能勝任朕又聞該省督撫遇有臺灣缺出不問屬員才具是否相宜多以私人調補而得缺之員從不以冒險渡海爲慮反視之爲利藪又安望其整頓地方實心辦事此等劣員若到臺灣無所津

益何皆視爲美缺而其津益非取之商民何從而得則致民怨滋事劫縣戕官實有由來矣從前歷任督撫已多身故難以追究雅德由該省巡撫擢用總督在閩最久非若富勒渾之尙得藉口在浙江辦理海塘者可比今貽誤地方至於此極著令其自思罪狀明白回奏若稍有不實不盡無難將伊拏問照黃仕簡任承恩一律治罪雅德不能似彼二人之尙可寬一綫也至富綱在閩撫任內雖未及雅德之久在任亦有二年而於地方事務緝盜安民全未整頓實難辭咎亦著據實明白回奏○辛亥 上閱健銳營兵○丙辰諭總管內務府大臣等昨徵瑞呈進節貢內雕漆鑲嵌花卉壁屏二對屏上皆嵌眞珠此等壁屏不過豫備令節陳設之用何必過事奢華徵瑞自任兩淮鹽政後查辦硝磺一案並不親身前往江甯惟恐與鹽務干涉意存迴護今呈進貢品又將眞珠飾

此無用之物取巧見長看來竟是坐享豐贍心思督亂除將壁屏
擲還外仍傳旨嚴行申飭○戊午 上詣 黑龍潭祈雨○壬戌
賜史致光等一百三十七人進士及第出身有差○甲子 上閱
火器營兵○諭據常青奏報臺灣南路賊匪侵擾府城屢經親率
官兵出城迎捕堵殺將弁用命義民爭先奮勇協剿接仗數次共
槍礮打死賊匪二千餘人生擒正法者五十餘名割獻首級奪獲
器械甚多並有賊目帶領手下二千餘人棄械投順隨同殺賊見
在南路賊匪經此番截殺勢漸消退一俟添調官兵到日卽統率
大兵前往諸羅等處各賊巢合兵會剿務期生擒首逆殲盡根株
等語此次賊匪有侵犯府城之信常青豫先設法防堵於桶盤樓
等衝要地方派令遊擊秦肇龍等各帶兵分紮營盤相機堵剿籌
畫調度俱合機宜逮賊匪分路攻犯府城常青親率官兵鄉勇迎

捕截殺斬獲甚多賊匪敗退常青年逾七旬尙能如此勇往督戰朕心深爲嘉獎伊係年老之人宣力海疆無親子在旁侍奉殊堪繫念著將伊子刑部筆帖式喜明賞給三等侍衛馳驛前往臺灣省親並將賞給常青之御用玉搬指一箇大荷包一對小荷包二對並節物庫紗二匹葛紗二匹香珠一匣香牌一匣香袋一匣官扇十柄卽著伊子帶往以示優眷常青感激朕恩益思奮勇迅能剿除賊匪永靖海疆朕必格外加恩也至遊擊蔡攀龍前據孫士毅奏稱聞伊帶兵打仗頗爲賊匪所畏之語今據常青奏稱該遊擊於上年賊匪攻圍郡城時卽督率弁兵奮勇截殺保護無虞追赴南路進剿嗣又調回郡城防守歷經打仗無不身先士卒奮勇直前且能審度機宜弁兵用命義民悅服是以屢次均獲勝仗殲賊甚多等語該遊擊甚屬奮勇出力爲賊匪所畏宜加恩擢蔡攀

龍著照常青所請卽起補臺灣北路協副將仍貸戴花翎若再能感激奮勇打仗遇有總兵缺出常青卽奏請升補以示獎勵其陣亡遊擊邱維揚把總余壽王澤高及陣亡受傷各兵丁均查明照陣亡例賞卹至鄉勇義民隨同官兵晝夜防範爲國家禦賊實屬可嘉其殺賊立功者應遵照前旨拔補千把總實缺其陣亡受傷者均著照兵丁之例加倍卹賞以示鼓勵此事總由黃仕簡任承恩二人一南一北互相觀望以致各鎮將效尤玩誤久稽蕞事幸而朕及早料及豫令常青前往臺灣督辦得以及時整頓並將失陷城池私自回至郡城之總兵郝壯猷正法如此賞罰嚴明自必壁壘一新士氣振奮所有添調各處官兵日內諒已陸續到齊軍威盛壯常青廓清後路賊匪卽統率大兵赴北路諸羅等處合兵會剿直搗賊巢生擒首夥各犯料此么廝草竊無難一鼓殲擒

功迅奏將此通諭中外知之

五月戊辰諭朕恭閱 世宗憲皇帝實錄內載直隸州縣太監之父兄弟姪在地方不無生事令該州縣詳報總督具題並交內務府約束懲治又內務府大糧莊頭並諸王大臣莊頭等滋事梗法之處分別嚴懲二條煌煌 聖訓實萬世所當遵守我朝 家法相承太監止備內廷灑掃供役不令干與政事從無似前代內監假竊威福任意妄行之批政卽內務府莊頭人等均知畏法設有不肖者亦皆有犯必懲實與編氓無異經我 皇考復加整飭官府肅然朕御極以來守而勿替方今綱紀修明各內監等皆敬謹守法其父兄弟姪自不至藉端滋事而總管內務府大臣及諸王公等身荷重恩於伊等屬下亦必嚴行管束不至倚勢招搖是目今實無此等事但奉行既久或恐視為泛常積久生玩防範稍疏

於政體甚有關繫著交直隸總督嚴飭各州縣實力查察儻有太
監家屬及莊頭等在外生事輕則隨時懲治重則參奏辦理不得
因見在尙無此等弊端稍存玩忽以副朕祇承 前訓杜漸防微
之至意此後著直隸總督十年一奏永爲例○諭本日兵部帶領
武職人員引見內承襲伯爵之趙曰必一員係趙良棟五世孫見
在陝甘督標學習期滿此項世職人員向來學習年滿後例應發
往該省或留部皆當以副將補用副將係武職大員且可護理總
兵設遇征調卽有專帶弁兵之責今趙曰必尙屬年輕未曾諳練
若遽以副將補用於地方營伍不能整飭儻致貽誤轉非所以保
全其祖父立功之意伊等爵秩較大又不便改補微末將弁嗣後
此項承襲公侯伯子男世職人員於學習年滿帶領引見後應令
在侍衛上行走俟三年後領侍衛內大臣看其才具如果能勝武

職大員出具考語咨送兵部帶領引見再以副將等官補用如才
具中平難期勝任仍令在侍衛上行走若能始終勤慎無過卽以
散秩大臣補用亦無不可所有本日引見之趙曰泌一員卽照此
例行○實授蘭第錫河東河道總督○申戊 上啓鑾秋獮木蘭

○免經過地方本年額賦十分之三○戊寅諭軍機大臣等常青
初抵臺灣存城兵數無多賊匪分路攻犯府城常青親率官兵鄉
勇迎捕截殺斬獲甚多賊匪敗退續調官兵未到以前尙能如此
連得勝仗見在大兵雲集軍威壯盛常青統領廓清後路無難將
竄聚賊黨盡數殲除是此時南路情形儘可無虞惟北路鹿仔港
一帶前據常青奏稱避難民俱在該處恐賊乘虛竊發欲留任
承恩在彼帶罪督兵今旣將任承恩遵旨送回內地則該處止有
柴大紀普吉保二人恐兵勢單薄難以支持且兵民人等見提督

解任送回內地未免心生疑懼而鹿仔港距大里杙賊巢最近深慮賊匪聞而生心乘閒竊發著傳諭藍元枚赴鹿仔港會同柴大紀普吉保整頓兵力遙爲聲援牽綴賊勢○以祿康爲盛京禮部侍郎由內閣學士遷○庚辰湖南鳳凰廳屬句補寨苗人石滿宜等滋事總兵尹德禧率兵討平之特旨嘉獎○辛巳前軍機大臣等據留京辦事王大臣等奏豫東商麥到通者已有三萬四千餘石足資接濟此項麥石係商人自行販運若令剋期送京糶賣恐一時車腳昂貴商人未能獲利或致將來商販聞風不前轉不能源源接濟又據縣恩奏此次查封米麥共六萬餘石鋪戶共有數百家稟令載運入廠腳價不無糜費莫若將鋪戶米麥停其入廠卽就近在本鋪內按照減定之價零星糶賣等語前經和珅以京城米價昂貴遵旨出示禁止囤積而該商等惟利是圖糧價未減因查出

各糧鋪囤積米麥共六萬餘石奏請於京城內外分設官廠減價
糶賣所賣錢文仍給付該商等收領原因該商等有心壟斷囤積
居奇按律治罪亦所應得今不將米麥入官僅令入廠減價平糶
而所賣錢文仍給該商等收領本所以懲儆奸商囤積使軍民咸
資口食該商等知所儆戒不至高擡價值米糧漸就平減商民兩
便亦不過一時權宜之計耳並非欲將嗣後所有商販米麥俱令
官爲辦理也今留京王大臣等及縣恩所奏似有爲難掣肘之意
自係誤會朕旨然既有此情節何不直奏見在商麥抵通正應飭
禁商人等不准在通囤積居奇至其於何時運京糶賣原可聽商
人自便不必官爲經理勒令剋期送京多費腳價轉致商人無所
獲利裹足不前此事惟在各該衙門隨時飭查若該商販運抵京
仍有私行囤積擡價病民及往外路販運惟利是圖者一經查出

卽將爲首奸商從重治罪所有米麥一併入官不必如前此僅令入廠減價平糶仍將賣價給還也若伊等照依市價漸加平減糶賣卽可任從其便以期商販流通此時止可且從絲恩所請仍著步軍統領衙門會同五城順天府官員於京城內外留心訪查實力妥辦俾商民兩有裨益將此諭令知之○壬午諭據常青奏接奉諭旨將郝壯猷押赴軍前正法在軍將弁無不共知儆懼見俟粵省兵四千名及駐防滿兵一千名到齊卽親自統領嚴整紀律從南路以至中路北路乘勝長驅自可剋期蕺事又據柴大紀同日奏到賊匪於二月十二二十六三月初二二十九四月初四初十十二等日賊首林爽文聚集夥黨分路侵擾諸羅縣城該總兵帶領遊擊楊起麟守備邱能成等督率官兵義民番壯出城迎捕堵殺爭先奮勇接仗數次共槍斃打死賊匪數千名生擒正法者

五十餘名割獻首級奪獲器械甚多並有奸匪張慎徽假充義民
先將與逆首林爽文不和之偽先鋒吳聰擒獻以爲憑信帶匪夥
三十八名求在軍前效力希圖內應該總兵見其形蹟可疑密飭
將備將匪夥盡行擒獲審得實情將該犯等卽行正法各等語所
辦甚是柴大紀駐守諸羅兩月有餘賊首糾合匪徒萬餘屢次侵
擾該總兵督率官兵義民奮勇截殺連得勝仗斬獲甚多賊匪敗
退並能識破內應奸匪擒獲正法柴大紀前次保衛郡城及此次
駐守諸羅堵禦賊匪始終奮勉出力朕心深爲嘉獎並將私往村
莊強取民人衣物之兵丁陳恩成審明正法衣物給還原主所辦
尤爲得當柴大紀著交部議敘並賞給大荷包一對小荷包二對
仍賞常青恆瑞奶餅各一匣藍元枚柴大紀普吉保奶餅共一匣
著各查明打仗出力將備官員分散賞給俾得均霑恩賚以示鼓

勵至該鎮摺內稱四月初十日與賊接仗時有鎮標外委劉欽兵丁程忠吳森三名遇賊懼怯不放槍礮卽行逃回以致賊衝入隊當經遊擊楊起麟把總陳洪猷等奮勇殺賊隊伍得以不亂隨將劉欽等三名恭請王命在軍前正法將首級徧傳各營示眾等語所辦甚是柴大紀深明紀律將臨陣退縮之弁兵立正典刑並將私取民家衣物之兵丁亦按軍法從事是以將弁兵丁共知儆懼用命爭先得以屢次克捷郝壯猷守禦鳳山所帶之兵計有二千餘名不爲不多當賊匪來犯兵丁等畏賊退避卽應將首先退縮數人立時正法使眾知儆懼其餘策令向前同心抵禦何至紛紛潰散乃郝壯猷不惟不能如柴大紀之賞罰嚴明且亦從而逃同身爲總兵大員似此畏怯倖生若不明正典刑其何以肅戎行而昭軍紀是郝壯猷之身伏刑誅尤爲情真罪當至常青所奏遊擊

鄭嵩延山在鳳山殺賊陣亡又委放兵餉之原任同知王雋一員
屬賊被害俱屬可憫鄭嵩延山王雋均著交部照例賜卹又柴大
紀連次打仗所有陣亡受傷弁兵俱著該部查明照例賞卹至鄉
勇義民隨同官兵晝夜防範奮勇殺賊實屬可嘉其陣亡受傷者
均著遵奉前旨照兵丁之例加倍卹賞以示鼓勵又柴大紀奏番
民吧咆被賊毆打死阿里稍被毆受傷較之鄉勇義民更當優賞
著常青分別妥爲賞卹其隨同柴大紀打仗出力之武舉陳宗器
黃奠邦亦著常青酌量獎賞具奏見在粵兵及駐防滿兵均已到
齊常青即可親自統領厚集聲勢一鼓作氣廓清後路以至中路
北路會同藍元枚等合兵進剿直搗賊巢生擒首夥各犯自可剋
期蕺事綏靖海疆將此通諭中外知之○諭軍機大臣等前據和
珅以京城米價昂貴遵旨出示禁止囤積而商人惟利是圖糧價

久未平減因查出各鋪店囤積米麥六萬餘石奏請於京城內外
減價糶賣而於如何派員稽查及作何減價平糶之處未及聲敘
明晰亦屬疏忽因閱日卽扈從啓程未經酌定章程分析辦理迨
縣恩接署步軍統領事務自應將此項查出米麥卽就城內城外
飭令該鋪戶遵照減定價值公平糶賣仍會同五城順天府遴派
妥員隨時稽查不使奸商從中仍得弊混以遂其居奇壟斷之錮
習則辦理自不虞掣肘而軍民皆霑實惠乃計不出此而惟拘於
設廠平糶之言槩令各鋪商載運入廠則所需腳價既未便令該
商自備亦斷無官爲給發之理遂致措施維艱殊不思奸商圖利
詭計百出若聽其自行糶賣漫無稽查則京城地方廣遠糧鋪散
處該商等賣少報多暗中仍私自囤積或竟偷往外路販運又何
從悉其弊端則禁止囤積減價平糶仍屬有名無實且該商等囤

積居奇經官飭減未遵已干禁譴今不將其米麥入官止勒令減價糶出已屬從寬辦理若伊等復敢投遞公呈不遵禁約卽係市儈齊行罷市惡習必應嚴加懲治將其米麥入官平糶以示懲儆無論此事係業經奏明奉旨固應官爲查辦卽步軍統領有管轄九門五營稽查地方之任旣已明出禁示亦豈可任奸販刁商抗違梗令置之不辦乎若因商鋪眾多公具呈詞阻撓政令卽曲從其請則嗣後步軍統領又將何以辦事設遇有糾眾抗官不法情事豈亦將惟所欲爲從而聽之乎縣恩究係辦事日淺未能諳練阿桂係曉事之人自能善體朕意著傳諭留京辦事王大臣等詳悉告知縣恩務須派員實力嚴查並令五城順天府各衙門一體稽察毋任奸商陽奉陰違得以肆其狡獪伎倆如有投遞公呈不遵禁示者卽當究出爲首或國積最多者一二人枷號示眾並將

該商米麥入官平糶則其餘各鋪戶知所做惕自不敢仍前效尤
庶不勞而事易集若惟事因循調停以博寬大之名將來設遇年
歲稍歉奸商擡價居奇又將何以辦理耶所謂水懦民玩轉足以
長刁風而玩官法留京辦事王大臣等及縣恩不可不咸喻此意
○甲申諭副都御史劉權之條奏籌辦民食一摺內稱雍正五年
設有八旗官局二十四處內務府官局三處收買旗米官爲轉糶
後因經理不善裁併停止請仍復八旗官局欽派大臣總理稽查
按照舊日章程酌定辦理等語米糧盈絀民食攸關總在轉運流
通源源接濟方不至市價騰踊商民兩受其益如有奸商牙販囤
積居奇擡價病民者自應嚴加查察隨時懲治見在京城查出囤
戶酌令減價平糶原以平價便民使商販無從逞其壟斷之術而
軍民不致食貴之虞但杜弊之法惟在去其大甚若槩欲官爲經

理勢必有所難行從前雍正年間設立八旗內務府官局收買旗米官爲轉糶原係一時調劑之法行之日久卽不免滋生弊端是以仍行歸併停止況國家重熙累洽生齒日繁百物價值勢不能不較前增貴卽如從前一人之食今且將二十人食之其土地所產仍不能有如是以市集價值不能不隨時增長若如該副都御史所奏欲倣照舊例設立官局無論弊竇均所難免且經管大臣耳目難周雖悉心稽查督辦家人吏胥等俱難保無暗中串通滋弊情事而奸商狡獪倩雇之人亦難一一從而辨識是欲防弊而弊卽叢生仍屬有名無實殊多未便但該副都御史既有此奏未必竟無所見著交留京王大臣會同大學士九卿八旗都統等將該副都御史所奏是否可行之處詳晰妥議具奏○丁亥諭向來滿洲蒙古繙譯鄉會試每屆三年將應否舉行之處請旨辦理但

思旗人進身之途甚廣並不專藉繙譯且其中亦未見出有真才也三年奏請考試一次爲期太近嗣後竟著每屆五年舉行一次亦不必請旨可行與否矣○己丑諭軍機大臣等據孫士毅等奏接據安南國王黎維禎之孫黎維祁咨稱該國輔政鄭棟專擅威福上年五月有西山土豪侵入國城鄭棟出奔被擄亡其國印嗣伊祖黎維禎病故伊父早亡黎維祁以嫡孫權管國事咨請權給憑信嗣後遇有題奏事件用此爲驗等因其中疑竇多端不便遽如所請見的擬檄稟詢問等語自應先如所擬辦理安南世守藩服最稱恭順該國既有土豪侵擾失去印信之事其時國王黎維禎尙在何以不行咨請直至此時始行咨報況印信係該國王執掌何以不在國王處所轉似鄭棟經管以致土豪侵掠鄭棟出奔被擄竟將國印遺失其中恐尙有別項情節自應檄飭查詢俟其

登覆到日再行酌量辦理至黎維禱病故該國既未經具本咨請
題達則該督等檄文此時不應將代爲具奏之處敘及見已令軍
機大臣等將所擬檄彙酌刪並經朕改定諭以見據該國嗣孫黎
維祁咨稱輔政鄭棟專擅威福乾隆五十一年五月有西山土豪
侵入國城鄭棟出奔被擄亡其國印是年七月十七日祁祖父病
故祁父早亡祁以世嫡權管國事未及專員詣闕告哀請命咨請
轉達天聽並請權給憑信令本國嗣後遇有題奏事件用此爲驗
等情據此查爾祖臣事天朝最稱恭順大皇帝俯鑒忱悃恩禮有
加今忽因病溘逝若奏聞大皇帝自必渥予恩榮但據爾咨係上
年七月開爾祖病故其時卽應咨報候覆專遣陪臣詣闕告哀請
命襲封庶幾弗墜爾國世守之勳用昭天朝賞延之澤何以闕歲
至今始行咨請代爲題奏又據來咨輔政鄭棟擅作威福以致西

山土豪侵入國城鄭棟出奔被擄雖係彼此挾嫌仇殺但爾國印信自應爾祖執掌何以轉似在鄭棟處所以致遺失自由爾國綱紀未能肅清且上年五月爾祖尙在因何不卽將失印緣由據實咨請題報試思爾嗣孫未經具本告哀未經奉旨承襲遽請給憑信無此體制我封疆大臣亦不敢擅自行此事也且爾國失去印信是否係因土豪搆亂一時倉卒遺失抑實有肆橫攘竊之人尙須聽爾國勒令繳出及國印何以不歸爾祖執掌轉似在鄭棟處所咨內均未分晰聲明儻奏明大皇帝垂詢根由無憑登覆獲咎非輕何敢草率代題乞恩所有失去國印一事合就移查爲此檄諭該國嗣孫遵照文到卽將印信是否遺失無存或今尋獲抑尙可追繳奉爲世守之處速卽具咨一一聲敘以便另爲據情代奏請旨遵行該督等可遵照檄行○癸巳諭柴大紀奏四月二十一

二十三二十七等日賊首林爽文潛聚夥黨分路侵擾諸羅縣城該總兵帶領遊擊楊起麟林光玉邱能成守備楊彰署諸羅縣陳良翼武舉陳宗器黃奠邦等督率官兵義民出城迎捕截殺爭先奮勇接仗數次共槍礮打死賊匪數百名生擒正法十餘名割獲首級奪獲器械甚多賊匪被官兵殺退四散逃竄等語柴大紀自駐守諸羅以來賊首糾合匪徒屢次攻擾該總兵督率官兵義民奮勇截殺連得勝仗賊匪敗退實屬可嘉柴大紀著交部議敘其隨從打仗出力之遊擊楊起麟林光玉邱能成守備楊彰陳明德署諸羅縣陳良翼武舉陳宗器黃奠邦貢監生張明義等著交常青俟將來到彼時查明具奏候朕降旨議敘獎擢○甲午諭向來內外文武大臣遇有應得處分該部議以降調革職革任經朕從寬留任及免其革任者甚多竟有一人而累至十餘案者蓋因該

大臣等屢經簡擢任事有年朕念人才難得且因其尙係公過是以每遇議處之案酌量案情從寬留任者不一而足但愈積愈多未免視為故常無所儆惕轉屬有名無實亦非整飭吏治之意也著交吏兵二部將內而大學士九卿八旗都統副都統外而督撫將軍副都統提鎮見任各員部議降調革職革任經朕從寬留任及免其革任者查明每人名下所積之案各若干次數分別開單進呈候朕詳加察覈其案情較重處分數多者或酌量議罰再准其開復其情節尙輕處分數少者或竟予開復庶屢獲愆咎人員知所做勸而宥其小過益當感激思奮如此各予以自新之路於激敎官方較爲嚴實嗣後並著吏兵二部每屆五年卽查明具奏一次請旨辦理著爲令○丙申諭軍機大臣等朕披閱監鼎元所著東征集係康熙年間臺灣逆匪朱一貴滋事官兵攻剿時伊在

其兄藍廷珍幕中所論臺灣形勢及經理事宜其言大有可採如
所稱諸羅一縣地方遼闊鞭長莫及應劃虎尾溪以上另設一縣
分駐半綫地方並於各要隘處所增添巡檢千把總員弁以資防
守等語後從其說添彰化一縣至該處迄今又閱六十餘年土地
日闢戶口日滋酌量情形有須添設文武員弁以資控制撫馭之
處前經降旨令常青李侍堯於勦賊完竣辦理善後事宜時一併
籌酌今閱藍鼎元卽有此議是臺灣增設官弁實爲最要又覆與
總督滿保經畫疆理一書內稱臺灣地方地土廣饒糖穀之利甲
天下過此再四五十年卽內山山後皆將爲良田美產若劃定疆
界將人民驅逐不許往來耕種勢難禁止等語所言亦屬有理臺
灣疆土旣開民安耕鑿處處皆成膏腴之地自楊景素議立界限
之後界外良田美產轉畀生番而生番以射生爲業不事耕種勢

必內地民人仍往偷墾日久徒滋事端又與提督施世驤書內稱賊眾至三十萬其中畏死脅從非盡出於本願或有挂名賊黨以保身家者若盡誅之多殺生靈亦屬無益似應止殲巨魁反側皆令自新等語見在林爽文糾合匪眾所到村莊以勢迫脅如有不從者卽行焚殺小民畏死偷生出於不得已勉強附從以致日積日多前後自出一轍朕於此事初起時卽經降旨諭令該督等惟將渠魁首逆及實在黨惡不法者殲戮無遺其被賊迫脅聽從者准其悔罪自新以解散賊黨藍鼎元之語適與朕意相合常青於整齊兵力進剿時不妨先將此意出示曉諭使被脅良民及從賊夥黨得以畏罪投誠亦解散賊黨先聲奪人之一法此外書內所列各條尙多可採者藍鼎元籍隸漳浦所著東征集閩省通行者必多著常青李侍堯卽行購取詳閱於辦理善後時將該處情形

細加察覈如其書內所論各條有與見在事宜確中利弊緊要者不妨參酌採擇俾經理海疆事事悉歸盡善以爲一勞永逸之計

六月戊戌以依蘭泰爲內閣學士

由光祿寺卿遷

○庚子調奇豐額爲江

蘇布政使以虔禮寶爲廣西布政使明祿爲山西按察使

由直隸北道

遷

○乙巳諭據留京辦事王大臣等會同議駁副都御史劉權之

條奏仍復八旗米局一摺官局之設原爲有益於旗民但當米價方昂之時設立官局卽須抑令旗人賤賣於官勢轉近於勒糴而經理不能妥協弊竇叢生仍屬有名無實自應停止已依議行矣至縣恩阿桂會同戶部順天府另摺議奏籌辦麥石以備明歲平糶一摺內稱豫省每年應徵粟米十二萬八百餘石以十之三改折麥石覈算可得麥三萬六千餘石恐尙不敷用因思山東地方向來種麥者亦多每歲應徵粟米二十四萬七千餘石若改麥石

以十之一覈算亦可得二萬餘石二共有麥六萬石以之豫備平糶可資充裕等語東省本年春夏以來雨澤愆期麥收歉薄節經降旨緩徵並令該撫酌借口糧開倉平糶以資接濟是東省今年斷不能改徵麥石運京朕所深知應俟明歲雨澤調勻麥收豐稔再行酌量辦理至豫省地土平衍民間種麥較廣本年俱屬豐收見據畢沅奏請以麥抵米是按該省情形酌量分數改徵麥石於民情甚便著依議行卽令豫省改徵運京以備明年平糶之用設或明年麥價平減無須出糶而麥石久貯陳朽爲虞卽照縣恩等所奏於俸米甲米均勻搭放更可行之經久又縣恩等摺內夾片奏稱見在麥麪價值旣已平減惟米價一時未能卽減懇請於京倉內撥米三萬石交與五城設廠平糶等語米糧價值民食攸關見在市價稍昂自應平糶以資調劑所請撥米三萬石爲數尙少

著竟於京倉內撥米五萬石每城交與一萬石若仍照舊例每城設立官廠既不免經費之繁而經管之大臣官員耳目難周勢不能不設之司坊官家人吏胥等承辦難保無暗中串通滋弊情事仍屬有名無實朕意不若於五城各派大臣一員在城內城外公同揀擇殷實大鋪戶各一處將官米交給該鋪戶自行糶賣仍官爲酌定價值令其稍霑餘潤俾資贍給所有賣出價值卽隨時繳納著派尙書胡季堂侍郎惠齡汪承霈海甯德成各分管一城率同該城御史專辦其事並會同步軍統領順天府嚴密查察如該鋪戶不遵官定價值仍私行擡高牟利者一經查出不但將官米撤回另選殷實大鋪承糶並將其鋪內自買米石一併入官爲平糶之用仍將該商治罪其有不願領米者卽是把持禁令奸商治罪如前另選一人充之如此懲一儆百則糶賣官米之商人知所

畏懼自不敢復蹈故轍而各城既有官米鋪戶平價出售小民自必皆赴該鋪羅買其餘民閒米鋪若擡價居奇亦無人向彼羅買則該商等自不能不做照官定價值出售米價不期賤而自賤所謂無官局之名而得便民之實似爲妥善至倉內官米若槩行發給恐該鋪無地容貯著酌定數目陸續發交該鋪戶收領零星羅賣並著留京王大臣總司其事見定於六月二十日卽行開羅其應如何酌定章程辦理之處卽行詳悉妥議迅速奏聞以便屆期舉行○諭軍機大臣等刑部奏請定民人婚娶蒙古婦女殺姦治罪之例一摺據稱直隸山西有同一起覺殺姦之案直隸則以蒙古婦女非民人所得婚娶槩以凡人鬪殺定擬而晉省則以婚娶已久既爲夫妻卽以殺姦科斷辦理參差請嗣後民人娶蒙古婦女在本年六月申明定例以前者悉照民人夫妻服屬各例畫一

辦理其在定例後槩以凡人謀故圖殺各本律分別治罪仍通行奉天等處將民人不得婚娶蒙古婦女曉諭揭示並載入例冊等語所奏大意近是定例徒滋繁擾取仍難於遵行國家休養生息中外一家本無畛域之分從前定例內地民人不准婚娶蒙古婦女或因民人等暫時出口謀生在彼婚娶易滋事端是以設有明禁近來生齒日繁內地民人子身出口貿易種地者不可勝計伊等相處日久往來婚娶勢難禁止設遇有姦殺等案自當按律辦理何必分別多立條款刑部堂官於此等案件如直隸具題民人吳得義扎死梁作棟及崔明亮砍斃伊妻烏雅里二案該二犯既經婚娶蒙古婦女是夫妻名分已定該督何以又援蒙古婦女非民人所得婚娶以凡人圖殺定擬刑部自應按律改擬科斷卽如晉省鄒南惟子毆斃郭秉元一案鄒南惟子因伊胞叔告知伊妻

與郭秉元有姦起意毆打該犯聽從糾約毆斃郭秉元與親屬捉姦之例相符亦應照律辦理以昭畫一而歸平允至民人不得婚娶蒙古婦女不但此條可刪並可無庸形之章牘將來遇有此等案件原可隨案定擬行所無事何必又生一番議論另立條款將此諭令知之○辛亥留京辦事王大臣永琅等奏酌定平糶章程事宜查向來五城平糶皆於內外城適中之地各設廠一二處使小民便於糶食今雖改交商辦仍應於內外城適中地方每城選擇殷實鋪戶二家令其承辦至倉貯均係蠶糧民閒逐日所買無多勢難自爲舂碾從前平糶蠶米小民糶買後兌給碾房每一升換細米八合雍正九年曾將細米平糶亦以蠶米加二覈算此次若照從前出糶蠶米則展轉兌換貧民既未能即時煮食且恐啓鋪戶及碓坊轉買囤積之弊臣等擬將領出之米卽交該鋪戶舂

細令其按八折交出細米每細米八斗仍照舊米一石比市價酌減平糶所餘碎米糠粃儘可抵給春碾工費至向來各處報部糧價參差不一茲據五城等處呈報實在糧價每廩稜米一石合制錢一千五百四十文今較市價酌減一百文其糶出細米卽照此以八折覈算如此後市價再能平減卽將出糶官米續行遞減至應糶米五萬石自應陸續發交見擬令五日一領每次領米二千五百石於本月二十日開糶先期知會戶部劄知倉場派定倉口令五城司坊官親身赴倉支領與臣等派員眼同量給各鋪戶收賣至各鋪戶所用升斗大小不一見臣胡季堂會同戶部照依官設倉斗較準烙印領取給用其赴倉領米車價例按道路遠近覈給此次係歸商辦應卽於出糶米價內按部定車腳隨時給發不得另行開銷所有糶出之錢卽照例令司坊官陸續解交戶部搭

放兵餉工程處等項之用以省易銀折耗至鋪戶等難保無私擡價值短少升合等弊臣胡季堂等及派出司員並步軍統領衙門順天府五城御史人數眾多若在各鋪逐日稽查又恐吏胥借端滋擾臣等惟有會同各衙門於各鋪戶左近地方另覓寺廟公所常川親往密行查察務使商民兩便得旨依議速行尋諭軍機大臣等留京王大臣等奏平糶章程一摺已依議速行矣惟摺內稱另覓公所親往密查一節斷不可行此次平糶米石交與殷實鋪戶不設立官廠原恐家人吏胥從中滋弊今復於各鋪戶左近地方另覓寺廟大臣等常川稽查勢仍不能不各帶司員人役則一切費用皆無所出卽難保無借端滋擾各鋪戶情事是無官廠之名轉滋勒索之弊此事止令派出之監糶大臣步軍統領順天府五城或五日或十日輪流親往各該處抽查情弊自無難立見儻

於米色升斗價值內或恐隨時參差不齊暗中舞弊不能卽時查出何難密遣親信員役前往糧買升斗則米色之純雜升合之大小及照官定價有無私自增加之處無難水落石出矣又何必另覓寺廟徒滋擾累耶將此諭令知之○壬子諭前經降旨將藍元枚調補福建水師提督其福建陸路提督員缺令常青李侍堯於柴大紀普吉保常泰三人內察看孰爲出力並才具堪勝提督者保舉一人候朕簡放今觀柴大紀自駐守諸羅以來屢次將賊敗退實屬奮勉可嘉柴大紀著卽補授福建陸路提督但柴大紀任臺灣總兵已經數年於該處情形較爲熟悉將來剿賊完竣所有善後事宜正須該提督隨同常青悉心籌辦柴大紀著以陸路提督兼管臺灣鎮總兵事務在被彈壓照料俟軍務告竣候朕酌量可以調回內地時再行降旨柴大紀未回任以前所有福建陸路

提督事務著常泰暫行署理○丙辰諭軍機大臣等常青本由都統將軍甫經簡授總督更事未多今自到臺灣後一切調度尙能妥協已出意料之外但伊究竟年逾七旬精神未能周到而恆瑞又係年輕未曾更事之人殊不可恃常青等昨奏請派一大員到臺灣督辦軍需其意未必非自揣難以勝任欲朕另簡大臣前往督辦軍務不可不豫爲籌及朕思此事自應阿桂前往督辦但念伊亦年逾七十之人不忍令其遠涉重洋和珅又不時手足舊疾復發且朝夕扈從承旨書諭難以分身將來派出之領兵大臣如海蘭察等亦非常青李侍堯所能統轄駕馭者因思福康安年力富強於軍務素爲諳練又能駕馭海蘭察等若以之前往督辦足資倚任見在甘省亦無緊要應辦之事著福康安接奉此旨卽帶印由驛起程前來行在陛見豫備差遣所有陝甘總督著勒保赴

甘省署理福康安於途次遇見時即可將印信交接尤爲便捷若
常青等續有奏報剿捕賊匪業已得手不難剋期集事卽馳諭福
康安仍可於途次回甘肅本任勒保亦回晉撫之任○丁巳諭軍
機大臣等昨據常青奏稱官兵剿賊出臺灣府城於關第應安營
等語朕意此處必有關聖廟宇常青避寫帝字改書爲第如果有
關聖廟竟應書寫帝字從前西路用兵之時兆惠紮卡困守我官
兵曾蒙關帝顯靈護佑我朝開基之初亦曾累顯靈應我滿洲無
不敬奉常青等皆係滿洲應卽往拈香虔祝以祈默佑○辛酉諭
前經降旨令常青藍元枚等就郡城鹿仔港一帶廣行招募卽會
經被賊迫脅附從者一經應募投到不妨卽食糧充伍旣可以添
我兵力又可以解散賊黨今藍元枚於未奉諭旨之前已將難民
勇壯者挑作義民給予口糧令其幫助官兵自屬得力卽予錢糧

入伍均無不可並著常青於該處被難之人一體挑募給糧充伍至大甲溪岸裏社之義民熟番不肯從賊見經藍元枚差弁曉諭令其攻迫賊巢分掣賊勢所辦甚合機宜常青年過七十親歷行陣督率侍衛章京將備併力向前人人用命朕心深爲嘉獎著賞戴雙眼花翎參贊藍元枚自抵鹿仔港以來一切調度合宜打仗得勝伊係藍廷珍之子伊父從前勦辦奸民朱一貴收復全臺奮勇克捷聲威久著今藍元枚在鹿仔港統兵進勦能繼家聲實爲可嘉亦著賞戴雙眼花翎臺灣道永福知府楊廷樺率領義民打仗亦屬奮勉均著賞戴花翎至鳳山潰兵前據常青奏報回府城有一千一百餘名續據柴大紀奏又稱有潰兵五百餘名已許令戴罪圖功是前次鳳山兵丁潰散已回者數目不甚相懸該將軍止須於柴大紀處覈對即可得實在數目至臺灣百姓被賊侵擾

焚毀村莊耕種失業該將軍等於收復各路時務妥爲安撫俾得盡力補種既可免其失所更得多獲糧食兩有神益此爲最要○壬戌東河睢州下汛十三堡河溢○命阿桂馳往睢州督辦河工